



آزات

تا ک 4

Knowledge Struggle Victory



بلوچ اسٹوڈنٹس آرگنائزیشن آزاد

آزات

سینٹرل ڈیموکریسی

سگار پبلی کیشنز

تاک: 4

سرہال: سینٹرل ڈیمو کریسی

چاپ: ستمبر 2023

گپال: admin@bsoazad.org

تند جاہ: bsoazad.org

ڈس: عطا شاد ڈگری کالج تربت

سینٹرل ڈیموکریسی

(Central Democracy)

پہچان:

اے گالبنڈ (Term) سینٹرل ڈیموکریسی یا ڈیموکریٹک سینٹرل ازم (مرکزی جمہوریت) یک سیاسی ترم عملے۔ بنیادی سورت اے اے آئیڈیا ماراچہ لینن اے کتاب " what is to be done" (کہ مارچ 1902ء چاپ بیت) تہ اے گندگ اے کیت انت۔ ایشھے زمانگ انت کہ روس اے لس مہلوک چہ زار روس (بادشاہ) اے زلم اے زور اکیاں باز سزار انت، جتائیں وهداں جتائیں شکلاں زور اکانی هلاپ اے جہد اوں کنگ بوگ اے انت، بلے اے جہدانی هاس اے دلجمیں آسرے دیم اے آهگ اے نہ انت، آئی اے چہ مسترین سو باں یکے ہمیش ات کہ چاگردی کسان اے مز نہیں جنز بہر اے بانگ ات انت یا کہ بے سر اے وت مستر ات انت۔ لینن اے پیسلہ کنگ ات کہ اے بہر اے بانگیں مہلوک یکجاہ کنگی انت اے تنظیم سازی اے بنیاد نوک اڈوگی انت۔ انجیں پارٹی یے دیم اے آرگی انت کہ زار روس اے هلاپ اے بہ اوشت ایت، لینن اے هیالال آشوب اے یک پارٹی یے یک آسر اے کسدے اے سرگت کنت انت۔ چوشکہ لینن نبشته کنت کہ:

"سنگتائ! مارا سک باز (کار) کنگی انت۔ سر جمیں روس ۽
 شنگ ۽ شائنگیں باسکانی سرکل ۽ کیونسٹ ٹولی یک پارٹی یے ۽ تلو ۽ کچھا
 ۽ یک مچ کنگی انت۔ انجیں پارٹی یے کہ آپروفیشنل آشوبیانی پارٹی بہ
 بیت، کہ آوت ۽ راداں آشوب ۽ آرگ ۽ پیش پد ر مہ کنت، ۽ چہ
 آشوب ۽ آہگ ۽ پداوں آشوب ۽ را مہکی ۽ بر جاہ دارگ ۽ داں مہلوکی
 زندمان ۽ مٹ کنگ ۽ وتی چست ۽ ایراں بر جاہ داشت بہ کنت۔"

اے کتاب ۽ ہا سیں کسد ہمیش ات کہ یک پلانے ۽ وسیلہ ۽ آشوب آرگ بہ بیت ۽ آ پلان
 نوکیں آشوبی سیاسی پارٹی ۽ گل ات انت۔ چہ اے کتاب ۽ چاپ ۽ شنگ ۽ پد سینٹرل
 ڈیموکریسی ۽ لیکہ ۽ بنیاد ۽ سوشلسٹ لیکہ ۽ مٹو گراں ہوار دنیا ۽ دگہ بازیں ڈیھ ۽ دمگاں
 آشوبی گل ۽ پارٹی دیم ۽ اتک انت، ۽ وتی گل ۽ پارٹیانی ہر ارکی یا کہ بنیادی آئینی اسٹرکچر
 ہمے آئیڈیا (سینٹرل ڈیموکریسی) ۽ پابند کت انت۔ پمیشکہ پہ سینٹرل ڈیموکریسی ۽ بنیادی
 پچار ۽ ہاتر ۽ الہی انت کہ مالینن ۽ بنیادی ہیال ۽ پکراں وتی گپ ۽ گالانی بہر بہ کنیں۔

لینن ۽ گور ۽ اے آئیڈیا ۽ بنگلی مکداں چہ یکے ایش ات کہ لس مہلوک ۽ بہر ۽
 بانگیں جنر ۽ ٹولیاں یک بنجای لیکہ، یک بنجای ڈسپن، یک بنجای تنظیمی اسٹرکچر ۽ یکیں
 اجتماعی پالیسی ۽ اسٹریٹجیانی بنیاد ۽ دیم ۽ بیارایت۔ ۽ دومی نیمگ ۽ آئی ۽ ہیال ایش ات کہ
 کسان، مز نیں بہر ۽ بانگیں مہلوکی ٹولی بادشاہ ۽ زورا کیں ہاکمانی تاکتاں پر ووش دات نہ کن
 انت، پمیشکہ ایش ۽ واستہ الہی انت کہ لس مہلوک یک پارٹی ۽ جہل ۽ یک

ہر ارکی (Hierarchy)ء پابند بہ بیت۔ لینن ء اے آئیڈیاء ہاشنگ ء شانگ ء سر۔ تنگس سوچ ء پکر پرورش دات آنت کہ آزر اکیں ہاکمانی ہلاپ ء ابیدے ء بجاہی لیکہ، ابیدے ڈسپلن، ابیدے اداراتی اسٹرکچر ء ابیدے مہکمیں پالیسیاں جہد ء ات آنت۔ لینن ء نزدیک ء اودے برجاہیں پوریاگرانی جہد ء جپاٹریڈ یونین (جنز) اڈ دات کن آنت، مہلوکی سیاسی جنز ء وهدی بستار ء گیش ابہار دات کن آنت بلے آ (پوریاگر) تہنا اے جنزانی بنیاد ء ہاکمانی تاکتاں پرورش دات کت نہ کن آنت۔ پمیشکہ ء تو اکیں ٹریڈ یونین ازم ء جنزانی وسیلہ ء آشوب آرگ ء بدل ء پوریاگر سیاسی گلانی بہر جوڑ بہ بنت۔

چوناہا لینن ء سینٹرل ڈیموکریسی ء آئیڈیاء مستریں من ء مراد دو بنت: یکے لیکہی (نظریاتی) بنیاد ء یکجاہی ء دومی یک ڈسپلن ء اداراتی اسٹرکچر ء ء جہل ء جہد کاراں یکجاہ کنگ ء پے آشوب آرگ ء ہاتر ء تنظیم سازی کنگ۔ چوشکہ لیکہ (نظریہ) ء سر ء لینن ء ہیال ایش بیت کہ آشوبی جنز تاں ہما وهد ء دیم ء اتک نہ کنت وهدے کہ اودے آشوبی لیکہ یے مہ بیت، ابیدے آشوبی لیکہ ء آشوبی جنز ء دیم ء آہگ ممکن نہ انت۔ دومی آوتی آئیڈیاء بنیاد ء اے ڈسکیشن ء دیم ء کاریت کہ یک جنزے ء میان ء عام ء خاص پیسلہ ساز مہ بیت، جنزے پیسلہ سازی ء ہک ہر کس ءے گور ء مہ بیت، ہر کسے پاد مئیت ء تحریکی بنیاد ء پیسلہ مہ کنت، بگندے ایشی ء واستہ یک اداراتی اسٹرکچر ء اڈویگ بہ بیت، یک پارٹی یے جوڑ کنگ بہ بیت، پارٹی ء بجاہی باسک یک، بجاہی لیکہ یے ء منوگر بہ بنت، سیاسی بستار ء باسا ء سر پدیں مردم بہ بنت، پیسلہ سازی ء ہسیت ء پھتنگ ء شیوار بہ بنت۔ ء ایدگہ لس

مہلوک ء ہما پارٹی ء بنی ادارہاں ہوار کنگ ء آہانی سیاسی ء نظریاتی ہیلکاری کنگ بہ بیت،
 یلئے پیسلہ ساز ادارہ پارٹی ء منجہ بہ بیت۔ چوش ہم نہ انت کہ اود ء پارٹی ء باسک ء ور کرانی
 پیسلہ ء تران، یا کہ سلاہ ء سو جانی ہچ پیہمیں بستارے نہ بیت، بگندے پارٹی ء زیلی ہر چو نہیں
 ادارہ (ہتکین، بنزہ یا کہ دگہ) آل پارٹی ء باسک وتی وتی متعلقہ جاہاں پہ پارٹی ء تحریک ء
 ہر چو نہیں پیسلہ ء شور ء سلاہ دیم ء آؤرت کن انت، ء پارٹی ء منجہ ہی باسک ہما باسکافی کلیں
 تراناں گوشدار آنت ء آہاں پارٹی ء منجہ ء دیم ء ایر کن انت، ء گڈی پیسلہ ء پارٹی ء منجہ
 کنت۔ منجہ ء گڈی پیسلہ پارٹی ء پیسلہ زانگ بیت ء کلیں پارٹی ور کر آئی ء سر جم پابند بنت۔
 ء وھدے کہ چہ پارٹی ء لیڈر شپ بز انکہ منجہ ء نیمگ ء کجام اول پیسلہ یے سر جم بوت گڑا
 ہچ ور کر ء باسک ء اے اجازت نہ بیت کہ پارٹی ء پیسلہ ء ہلاپ ء بہ روت انت یا ہما پیسلہ ء
 مہ من ایت۔ پر چاکہ لینن سینٹرل ڈیمو کریسی ء توک ء دو جتائیں آئیڈیا آل یکجاہ یک لہی
 اسٹر کچرے ء تہ ء ہوار کنگ ء انت۔ یک نیمگے ڈیمو کریسی انت کہ اود ء ہر باسک ء وتی
 گپ ء ہر ء رائے ایر کنگ ء ہک دیگ بوگ ء انت، ء باز جاہاں آہاں اے گپ ء ہاتر ء
 گیش دلہڈی دیگ بیت کہ آپارٹی ء پیسلہ سازی ء عمل ء تہ ء بہر بہ زور انت، پر چاکہ اگاں
 ادارہ ء جہلی سطح ء آئی باسائیں باسک ء ور کر بہر مہ زور انت ء تہنا لیڈر شپ ء گپانی پابند بہ
 بنت گڑا ہما پارٹی ء ادارہ ء تہ دگہ نوکیں ہچ پیہمیں آئیڈیا ء سوچ نیت انت ء دراہیں
 باسک ء ور کر تہنا پارٹی ء توک ء لیڈر شپ ء پیسلہانی پابندی ء کن انت ء yes man جوڑ
 بنت، ء اے رنگ ء پارٹی چہ بن ء لیڈر شپ پیدا ک کنت نہ کنت، آئی ء کیڈر سازی ء عمل

اوشٹ آماج بیت ء چہ بن ء مہکمیں تاکتے نہ دارایت۔ ہمیشکہ ڈیموکریسی ء شکل ء پارٹی ء دراہیں ور کر ء باسکاں اے ہک دیگ بیت انت کہ آپارٹی ء کار ء پروگرامانی تہ ء بہر بہ زور انت ء پارٹی ء راجتائیں معاملہ آنی سر ء وقتی شور ء سلاہ ء سر ء سوچاں بہ دینت۔ ء دومی نیگ ء سینٹرل ازم انت، بزاتکہ مھے ہیال ء سوچ ء پروگرام کہ پارٹی ء دیم ء سرجم ء کایت ء ایر بنت، پارٹی ء لیڈر شپ ہماھیال ء لیکھاں جنز ء لوٹانی بنیاد ء دیم ء ایر کنت ء پیسلہ زورایت، ء وھدے کہ پارٹی ء بنجاہی لیڈر شپ ء جنز ء ہک ء پارٹی ء سطح ء چونیں پیسلہ یے زرت، گڑا ہما پیسلہ پارٹی ء گڈی پیسلہ زانگ بیت انت ء پارٹی ء ہک باسک ء ور کر ء سر ء المی بیت کہ آپارٹی ء پیسلہ (بزاتکہ بنجاہی پیسلہ) ء پابند بہ بیت انت۔ لینن ء ہیال ایش بیت کہ پارٹی یک Debating society یے نہ یے کہ اود ء ہک رنگیں گپ ء ہبر ء گنجائش بہ بیت انت، ہر کسے بنیت ء ہرچی بہ گش ایت ء آئی ء ہرج ہبر پدا پیسلہ ء بستار ء منگ بہ بیت، بگندے پارٹی ء پروگرام ء را آرگنائز ء مہکمیں رنگے ء جنزینگی انت گڑا اود ء سینٹرل ازم ء ہیال ہم ضروری انت تاکہ پیسلہ بوگ ء پد آئی سر ء جوانیں رنگے ء عمل بوت بہ کنت انت۔ ہمیشکہ لینن ء جھدنگ کہ ڈیموکریسی ء سینٹرل ازم ء وٹیں آئیڈیازیکجا بہ بنت تاکہ پارٹی مہکمیں رنگے ء آشوب ء عمل ء سرجم بہ کنت۔ لینن ء نز ء مھے اداراتی ہر ارکی سینٹرل ڈیموکریسی یا جمہوری مرکزیت زانگ بیت۔

• سینٹرل ڈیموکریسی ء آئیڈیاء جوڑشت ء کسانیں پچارے ء رند دیمتر ء ماگیش

زانگ ء جھد ء کن ایں کہ سینٹرل ڈیموکریسی ء گالبدنی مانا چے انت؟ آشوبی

پارٹیء گلابی میانء آئیء ارزشتء اہمیت چے انت؟ سینٹرل ڈیموکریسیء
 بنیادء اداراتی ہر ارکی چون گیشینگ بیت؟ ء مئے آشوبی جنزء ادارہانی میانء
 سینٹرل ڈیموکریسیء میار چے انت؟ مئے گورء اے آئیڈیا کجام کساسء وجود
 دارایتء آشوبی گلء جنزء بستارء آئیء لوٹء ضرورت چے انت؟

مفہوم / گیشوار:

اگاں ماے گالبدء لبزی بنیادء بہ گیشین ایںء آئیء ماناء متلبانی سرپد بوگء جہدء بہ کن
 ایں گڑا بوت کنت ماے گالبد (سینٹرل ڈیموکریسیء) اسلیں مفہومء سرپد مہ ہیں۔
 چوشکہ "سینٹرل" بزاتکہ مرکز / مرکزیت ء "ڈیموکریسی" بزاتکہ جمہوریت۔ اے
 ہر دوئیں گال گوں یکے دومیء ماناء تصورء بستارء باز متضاد انت، چوشکہ یک نیمگے
 مرکزیت انت (بزاتکہ سینٹرل تاکت یا کہ واکداری پشدارگ بوگء انت کہ
 اودء منجہای راج انت) ء دومی نیمگء جمہوریت انت (بزاتکہ ہم بروبری انت، کل یک
 حسابء واک ء اختیار دار انت) ہمیشکہ لبزی بنیادء ماے گالبدء مفہومء سرپد بوگء
 جہدء مہ کن ایں، بگندے ہما چین یا کہ ہر ارکیء بنیادء کہ سینٹرل ڈیموکریسی گردش
 کنت / ورک کنت ہما سٹر کچرء جندء سرپد بوگء جہدء بہ کن ایں۔

سینٹرل ازم: بزانکہ مرکزیت۔ چوشکہ ہرچ پارٹی وتی پارٹی ء لوٹانی بنیاد ء آئی ء بنکی اسٹرکچر ء ٹیمین ایت، اسٹرکچر ء میان ء آئی ء بالائی ء زلی کسان ء مز نہیں سک باز ادارہ ہوار بوت کن انت۔ چوشکہ بنجاہی ادارہ، ہسکینی ادارہ، بنزہی ادارہ، سیل ء دگہ باز (دائگیں ادارہانی نام تہندا درور آنت، چریشی ء اید اول دگہ زلی ادارہ بوت کن آنت)۔ چوشکہ پارٹی اسٹرکچر ء میان ء جتائیں گل ء کمیٹی ہم اتک کن انت، نون ایش ہما پارٹی ء جند ء سر ء انت کہ آوتی اسٹرکچر ء وتی جنر ء لوٹانی حساب ء چینکس پراہ ء شاہیگان کنت۔ پارٹی ء میان ء چہ درستاں بالائیں ادارہ پارٹی ء سینٹرل کمیٹی زانگ بیت، کہ جہل ء کلیں گل، کمیٹی ء ادارہانی پیسلہ ساز ء واکد اریں ادارہ زانگ بیت۔ اد ء سینٹرل ڈیموکریسی ء کرد ایش بیت کہ پارٹی ء میان ء ہمے جوڑیں اسٹرکچر (برز ء تا جہل ء) ء یک گینیں دائرہ کار ء میان ء، یک ہر ارکی (hierarchy) ء بنیاد ء، یک منظمیں ڈسپلن (Discipline) ء گو ما برابر دارگ ء ہمے ہر ارکی ء جتائیں ادارہ (بنزہ، ہسکین، بنجاہ، گل، کمیٹی) آنی میان ء یک ہسنتی ء یکجاہی یے پیدا ک کنگ ء یک ادارہ ء رادومی ادارہ ء پابند کنگ، پہ درور: فرد ء پارٹی ء پابند کنگ، زلی کلیں ادارہاں بالائی ادارہ ء پابند کنگ: سیل ء رابنزہ ء پابند کنگ، بنزہ ء رابنزہ ء پابند کنگ، ہسکین ء رابنزہ ء پابند کنگ، اقلیت ء راکثریت ء پابند کنگ، پارٹی ء زلی کلیں گل ء کمیٹیاں پارٹی ء بالائی ادارہ ء پابند کنگ انت۔ کہ چرے عملاں بہر ء بانگ یا کہ شنگ ء شائگیں ایردستیں سماجی مہلوک یک ہسنتی ء گینیں کشکے ء سر ء اتک کن آنت ء یک ہر ارکی ء پابند بنت۔ چہ لس رویہ، سوچ ء پکراں

در کابینت ءیک پارٹی ءے دیمآ آڈر ٹنگس آشوبی راہ ءے راہبندانی پابند بنت کہ ایشانی آسر ءیک منظمیس مہلوکی آشوبی جنزے پیدا ک بوت کنت۔

ڈیمو کریسی: سینٹرل ڈیمو کریسی ءیک پہلو یے مرکزیت ءے مانا ءے بستار ءے پیہنگی انت کہ اود ءے بالا تا جہل ءے یک منظمیس گرفت ءے مہارے بیت، سچ ادارہ یا کہ فردے ءے را یک رزہ یے ہم چہ گینیس دائرہ کار ءے دراہگ ءے موکل نہ بیت۔ ءے دومی پہلو جمہوریت انت (کہ ایش ہر دو پہلو مہمرائی ءے کار کن انت)۔ برز ءے در شان کنگس پارٹی ءے میان ءے ہرچی کہ ادارہ ہست انت (بزہ ءے تا بجاہ ءے)، ہمک ادارہی باسک ءے راہمانی ءے متعلقہ ادارہ ءے میان ءے و تو اکی ءے آزاتی ءے سر جمیس ہک دیگ بنت، بز انکہ وتی وتی متعلقہ ادارہاں (بزہ، ہٹکین، بجاہی دیواناں) وتی ہیال ءے لیکہاں دلجمی ءے در شان کنگ، پہ گل ءے آشوبی جنز ءے وتی رائے آنی دیم ءے آرگ، اداراتی کار ءے پروگرامانی کمی گیشی آنی سر ءے دلجمی ءے گلد ءے باوست کنگ، بز انکہ وتی ادارہانی میان ءے مکالمہ ءے سر جمیس آجوتی ءے چہ گل ءے نیمگ ءے گیشینگ میں وتی اگدہ ءے زمہ داریانی بنیاد ءے باسکان ءے وتی کار ءے کردانی میان ءے ہم سرجم و تو اکی دیگ بیت۔ کہ چرے قول ءے فعلانی جمہوری عملاں پارٹی ءے باسک تنظیم سازی ءے ہاتر ءے ردوم زور آنت، آہانی میان ءے احساس زمہ داری گیش بیت ءے ہمے عمل پہ پارٹی ءے راہی جنز ءے کیڈر سازی ءے مازمان بیت۔

اے آئیڈیاء بنیاد ءے ہمینکس کہ فرد یا کہ زلی ادارہ پارٹی ءے بجاہ / بجاہی پروگرام ءے پابند انت تاں دگہ ہمینکس آو تو اک ءے با اختیار ہم ہست انت۔ بلئے اد ءے و تو اکی ءے با اختیاری ءے دائرہ کار ءے جنڈ چہ پارٹی ءے بجاہ ءے نیمگ ءے ٹینگ بوتگ، بز انکہ یک ہسابے ءے ماگشت کن ایں

کہ اداء جمہوریت ء چند پابند انت مرکزیت ء۔ بلکہ دومی نیمگ ء اگاں ما بنجاہ یا کہ مرکزیت ء چند ء جوڑشت ء بہ وان ایں یا کہ بہ گئیٹین ایں گڑا پد اسینٹرل ڈیمو کریسی ء شاہیم ء ہر دو سنگ یک حساب ء اوشت انت۔ پہ درور: بنزہی کابینہ چہ کلیں بنزہی سیلانی یا کہ باسکانی رزاء گینکاری ء دیم ء کنت ء واکدار جوڑبیت کہ آئی ء بنزہی سطح ء کلیں پیسلہ سازی ء واک رس انت۔ ہمے پیم ہنکینی کابینہ چہ بنزہی زیلی ادارہ ء باسکانی رزاء دیم ء کنت انت۔ ء ہمے ڈول ء بنجاہی لس مجلس ء ڈولیں دیوان ء بنجاہی ادارہ ء باسک ہینگ ء چہ زیلی ادارہانی نیمگ ء دیم ء آرگ بنت۔ بزاتکہ پارٹی ء کلیں بالائی ادارہ چہ جہلی ادارہانی رزاء منشاء واکدار ء باختیار کنگ بنت انت، پمیشکہ اداء یک مز نہیں زمہ داری یے اداراتی بنجاہ سر ء کنت انت کہ آگوں سنجیدگی ء بنی ادارہانی میسہاں گل ء کار ء پروگراماں دیم ء بہ بر انت۔ ء زیلی ادارہ سرجم پابند انت کہ بالائی ادارہانی داتگیں پروگراماں بہ من انت ء بنجاہ نیمگ ء داتگیں پیسلہاں ہرچ ہال ء ہرچ جاو ء سرجم بہ کن انت۔

اگاں سینٹرل ڈیمو کریسی ء آئیڈیا ء تہ ء ڈیمو کریسی (جمہوریت) Ignore کنگ بہ بیت ء ہرچ پیسلہ بنجاہ چہ وتی منشاء بہ زور ایت ء جہلی ادارہ ء پارٹی ء باسک ء ورکرانی شور ء سلاہ ء ہج اہمیت مہ دنت گڑا اے پارٹی ء تحریک ء مز نہیں تاوان دات گت کت انت بلے اداء ایش ہیال اوں گور بہ بیت کہ جمہوریت ء نام ء سر ء ہمک و تریں ہیالانی ادارہانی تہ ء جاہ دیگ اوں پہ پارٹی ء تاوان انت، پمیشکہ پارٹی ء ہمک باسک پہ

پارٹیء پر وگرمانی دیمء برگء سرجم و توک انت، بلے آئیء ہمدائرہ کارء پابند بوگی انت کہ چہ بنجاہء نیمگء گکیشنگ بوتگ۔

سینٹرل ڈیموکریسی یک تنظیمی راہء راہبندے، بلے المی نہ انت کہ ہر چو نمیں گلء پارٹی اے راہبندء کار بند بہ کن انت، بگندے ہرچ گل / پارٹیء را و ہدء جاوردانی لوٹء حسابء وتی راہبندء اسٹرکچر گکیشنگ لوٹ انت۔ بلے چو شکہ ایردستیں چاگردانی میانء یکے آشوبی جنزےء پیدا کنگء ہاترء آشوبی پارٹیانی دیمء آہگ اولی شرط زانگ بیت، کہ ہما پارٹی ایردستیں سماجء بہرء بانگیں مہلوکء سوچء پکراں یک پلیٹ پارےء یک لیکھےء بنیادء یکجاہء منظم بہ کن انت۔ ایش ہا آئیڈیا یا کہ ترز عمل انت کہ یہ گلء پارٹیانی منظم کنگء کار بندگ بیت۔

ارزشتء اہمیت:

پہ سینٹرل ڈیموکریسیء ارزشتء بستارء گیش سرپد بوگء ہاترء مارا جمہوریتء مرکزیتء میانء ہمگرنجیء جند سرپد بوگی انت۔ ابیدء جمہوریتء مہلوکء راستیں جہدء آئیء بستارء سرپد بوگ ممکن نہ انت، جنزء قیادتء را مہلوکء آہانی میانء بودستانی سرپد بوگء ہاترء آہانء آہانی جمہوری ہک دیگ لوٹ انت، تاکہ چرائیء

مردمانی ساچشتی بودشت ء تجربت دیم ء آرگ ء کار بندگ بہ بنت، تاکہ گل یک سانسنی اندازے ء دیمروئی ء نیمگ ء گام جت بہ کنت۔ ء دومی نیمگ ء چہ ابید ء مرکزیت ء گل ء باسک ء مہلوک ء ساچشتی بودشت ء تجربت شنگ ء شانگ ء بہر ء بانگ بنت، ء گل چہ وتی ساچشتی، علمی ء تجربتی تاکت ء زہر بیت۔ ہمیشہ ابید ء جمہوریت ء مرکزیت ء ابید ء مرکزیت ء جمہوریت بے مانا انت، اے ہر دو آنی مشترکہ عمل یک ہمیں کردے پیلو کت کنت۔

ء اے گپ ء تہ ء دورائے نیست کہ روسی سوشل ڈیموکریٹک لیبر پارٹی ء نیمگ ء "سینٹرل ڈیموکریسی" ء تصور دیم ء کیت ء لینن آئی ء رابا قاندہ عملی بنیاد ء پارٹی ء پریکٹسانی بہر جوڑکنگ ء ہاتر ء یک دلجمیں کردے پیلو کنت۔ بلئے اے ہر ہم زہن ء بہر بیت کہ سینٹرل ڈیموکریسی ء تصور مارا تہنایک آشوبی پارٹی ء گور ء گندگ ء نیت انت، بگندے بیستمی کرن ء کہ وھدے آشوب ء آجوائے تنظیم ء پارٹی سرچست کن انت گڑا مارا گیشتر آشوبی پارٹیاں میان ء سینٹرل ڈیموکریسی ء تصور مہمگی ء گندگ ء کیت انت، آ توری زاروس ء ہلاپ ء کمیونسٹ پارٹی ء آشوبی جنز بہر بیت، کومتانگ ء جبرانی ہلاپ ء آشوبی جنز بہر بیت یا کہ ویتنام، چائنا ء کوریا ء جنگ بہر بنت۔ اے کرن ء کلیں آشوبی تحریکانی تہ ء سینٹرل ڈیموکریسی ء تصور مارا مہمیں ڈولے ء گندگ ء کیت انت ء کجام جاہ ء کہ سینٹرل ڈیموکریسی ء تصور گیش مہکم بوتگ گڑا آئی ء آسر ء مارا مہمیں جنز اول دیم ء گندگ اتلگ انت۔

چہ اداء بگندے اے جست پاد بنیت کجام لوٹ ۽ بنیاد ۽ آشوبی جنزراں سینئرل ڈیموکریسی ۽ تصور ۽ بنیاد ۽ وتی گل ۽ پارٹی اڈا تنگ انت؟ ایسی ۽ مستر ۽ ارز انتریں پسہ ہھے بیت کہ آشوبی جنزریا کہ آجوتی ۽ جنگ ہر کجا کہ بہ بیت، آئی ۽ دیمنی گوں زور آور ۽ زوراکانی مزن مزین مشینری ۽ تاکتاں گوں بیت، آشوبی ہچ پیہیں جنزراں گوں آسودگی ۽ ایہنی ۽ وتی پروگراماں دیم ۽ برت نہ کنت، پمیشکہ آئی ۽ واستہ المی بیت کہ آپارٹی اسٹرکچرے ۽ وسیلہ ۽ سینئرل ڈیموکریسی ۽ سوچ ۽ مہکم بہ کنت ۽ وتی جہد ۽ دیم ۽ بہ بارت۔ تاکہ چرائی ۽ وسیلہ ۽ آشوبی جہد ۽ میان ۽ وتی پارٹی ۽ پارٹی پروگراماں ابیدے دگہ مزین تاوان (ہما تاوان کہ جنزراں جند ۽ ہلا س بہ کن انت) پے ۽ گوں مہکمی ۽ برجہ داشت ۽ دیم ۽ برت بہ کنت۔ چیا کہ آشوبی جہدانی میان ۽ مستریں چیز جنگ ۽ بندت کنگ نہ انت، بگندے آئی ۽ دارگ، آئی ۽ تاں منز لے ۽ سرکنگ ۽ رند ۽ آشوب یا ڈیہ ۽ بدلی ۽ تاکت ۽ سمبالگ ۽ دارگ انت۔ چوشکہ فیڈل کاستر وگش ایت "ہچ آشوبے تاں ہا وھد ۽ نام نیاریت تاکہ آوت وتی دفاع ۽ کت مہ کنت۔" ۽ سینئرل ڈیموکریسی وتی دفاع ۽ منظم کنگ ۽ مستریں سلاہ زانگ بیت۔

پارٹیء میان ء سینٹرل ڈیموکریسی:

نوآبادیات یا کہ نیم نوآدیاتی چاگرداں پہ سامراجی زلم ء جبرانی حلاپ گھگیری (Resistance) ء ہاتر ء آشوبی پارٹی ء دیم ء آہگ الی انت۔ چیا کہ سامراج حادثاتی بنیاد ء پیدا ک نہ بنت بگندے سامراجانی سامراجیت یک پروسیسے (Process)، یک پالیسی ء یک دانستہ عملے پمیشکہ آئی ء پرش دیگ ء ہاتر ء دانستہ بنیاد ء آشوبی پارٹی ء یکار بیت۔ چیا کہ ابید ء مہم ء منظمیں پارٹی ء سیاسی ء سماجی جاوانی میان ء سیاسی جد ء جہد کنگ ممکن نہ انت۔ سیاسی ء آشوبی پارٹی ء وسیلہ ء مہلوک ء سیاسی ء علمی تربیت کنگ بیت ء آہمینکس تیار ء لانک جوڑ کنگ بنت کہ وتی سانج ء چیزہ سرپد بہ بنت ء سامراج ء حلاپ ء مکابلہ کت بہ کن انت۔ پہ ایشی ء ہاتر ء آشوبی پارٹی ء ہمک ادارہ ء عملی میدان ء دراہگ ء کار کنگ ء پارٹی ء پروگرام دیم ء آرگ لوٹ ایت، وتار ء وتی مہلوک ء میان ء سر کنگ ء آہانی پکری ہیلکاری (نظریاتی تربیت) کنگ لوٹ ایت، تاکہ پارٹی ء جوڑشت یا کہ اسٹرکچر ء راہبند ء بنیاد ء عمل ء دائرہ کار بہ گیش ایت۔

سینٹرل ڈیموکریسی یک گلے ء میان ء راہبند / ڈسپلن (principles) یے ء کرد ء پیلوکت۔ ایش ہمالیکہ انت کہ آئی ء مسترین کار گل ء ہر ارکی ء یک منظم ء سکتیں بنیادے ء برابر دارگ ء برزی ء جہلی ادارہانی میان ء یک دلجمیں ہم آہنگی ء ہمنستی یے

پیدا کنگ انت۔ ہمے لیکہ انت کہ فردے چه انفرادیت ء کش ایت ء گل ء پابند جوڑ کنت (کہ چریشی ء یکے ء باسکانی تہ ء سماجی عام سوچ ء پکر یا کہ رویہ دارگ بنت یا کہ هلاس کنگ بنت ء دومی یک ایرد ستیں سماجی مردے ء بستار ء باسکانی میان ء دژ من ء جوڑ کنگیں پکر ء پیر: زبانی، مذہبی، رنگ ء نسلی یا کہ دگہ۔۔ کاؤنٹر کنگ بنت ء فرد چرے درستاں بالا بنت ء گل ء پروگرام ء بہر بنت)، اقلیت ء را اکثریت ء پابند کنگ، زیلی ادارہاں ء بالائی ادارہاں پابند جوڑ کنگ، بزاتکہ یک پارٹی ء میان ء نہ یک فردے ء اے اجازت هست کہ آگوں وتی قول ء فعلان چه ادارہ ء پروگراماں چپ بہ روت ء نیکہ یک زیلی ادارہ ء اے اجازت هست کہ بالائی ادارہ ء پروگراماں سرگوز بہ کنت۔ پارٹی ء کجام اوں ادارہ ء میان ء نزوری، ردی کمی ء گیشی ء سورت ء زیلی ادارہاں بالائی ادارہاں جو ابده کنگ، مزینیں ردی ء نزوریانی بنیاد ء باسک ء ادارہاں سز ء جزاء عملاں چه گوازیگ۔

گوں ایشاں هوار یک پارٹی ء میان ء سینٹرل ڈیموکریسی ء دگہ مستریں هاسیتے جمہوری عمل نیگ انت، کہ چریشی ء گل ء میان ء باسکانی ساجشتی، علمی ء تجربتی بودشت ردوم زور انت کہ ایشی ء برورد ء گل ء جنز ء میان ء دلجم ء لائکیں کیڈر پیدا ک بنت۔ وهدے کہ باسکاں پارٹی ء توک ء فیصلہ سازی ء کار ء پروگرام ء واستہ آھانی گپ ء هیالال اہمیت دیگ بیت گڑا باسک پہ پارٹی پروگرام، جنز ء آشوب ء سو بین کنگ ء دیم ء برگ ء هاتر ء گوں دلجمی ء کار کن انت ء در اھیں کاراں وتی سر پد بنت ء آھانی بیلو کنگ ء

جہد کن انت۔ چریشی چہ پارٹی تنظیم ء توک ء کیڈر سازی ء عمل گیش بیت ء بنزہ ء چہ
 ہنکین ء پدا ہنکین ء چہ بنجہ ء جنزہ ء ہاتر ء لائیکس مردم تیار بنت ء ہکمیں رنگ ء دیم ء
 کایت کہ آپارٹی ء آشوب ء ہاتر ء الی انت۔ جتائیں باسک گوں وتی جتائیں بودشاں دیم ء
 کایت ء پارٹی ء جنزہ ء میان ء وتی کرداں بیلوکن انت۔ باسک کہ زہنی بستار ء جیرگ ء کار
 کنگ ء وتو اک بنت گڑ اپارٹی سانسسی بنیاد ء نوکین ترز کاراں گوں جنزہ ء دیم ء برت کنت،
 فرسودہ ء جمود ء آماجیں سوچ ء پگر ء عمل و لگوج کنگ بنت۔ پارٹی ء کارانی توک ء باسکانی
 بہر زورگ سک بازاری انت پرچا کہ پارٹی ء بنجہ ء تہ ء چیزے مردم نشنگ ء ایشانی ہیال
 سرجم بوت نہ کن انت، چوشکہ بازیر انجیں ہند ء دگ آست انت کہ اود ء پارٹی ء ہج
 لیڈر ء دورہ نہ کنگ یا کہ اود ء مردمانی ہیال ء مزاج ء سرپد مہ بیت گڑاے الی انت کہ
 پارٹی ء راہما ہند ء دگ ء پیسلہ سازی کنگ ء ہاتر ء ہما ہند ء دگ ء باسکانی رائے اہمیت
 دیگ لوٹ ایت ء پارٹی پروگرام ء ہما ہند ء دگ ء باسک ء ممبرانی رائے مطابق ء جوڑ
 کنگ لوٹ ایت۔ پارٹی ء کارانی ہمکنگ ء توک ء باسکانی کارانی تہ ء بہر زورگ الی انت۔

سینئرل ڈیمو کریسی ء کسانیں پریمیے پیش کنگ ء پدا آئی ء ہمے بہرگان
 (پہلوان) ء کے گیش گیشنگ ء جہد کن این، تاکہ پہ وانوک ء آئی ء سرپد بوگ گیش
 ارزان بہ بیت:

- فرد ء پارٹی ء پابند بوگ
- اقلیت اکثریت ء پابند بوگ

• ذیلی ادارہ، برزی ادارہ، پابند بوگ

• فردے پارٹی، پابند بوگ:

آشوبی پارٹیانی میانء بہ باسک سازیء ہاترے چندے بنداتی شرت بنت؛
 باسک پارٹیء بنیادی کسدء پروگرامء سرپد بہ بیتء گوں آئیء تپاک بہ دارایت، باسک
 سازیء ایدگہ بنیادی لوٹ (چوشکہ باسکی فیسء جم کنگ، گلء راہبندی ڈسپلنء منگ یا کہ
 ایدگہ) آں پیلو بہ کنت۔ وھدے کہ یک باسکے رضاکارانہ بنیادء باسک سازیء بنکی
 پروسیسء گوازیگء پد پارٹیء باسک جوڑ بیت گڑا پرائیء الم بیت آچہ وتی زاتء زاتی
 واہشتء دنیاء در بنیتء سرمجمء پارٹیء پابند بہ بیت۔ چیا کہ آشوبی پارٹیء جوڑ بوگء
 بنیادی سبباں چیکے ہمیش انت کہ سماجی مہلوکء چہ انفرادی سوچء پکراں کشگء سماجی
 اجتماعی جیڑہء بنیادء اجتماعی لیکہء پروگرامء بنیادء یک تلوپےء سرء یکجاہ کنگ۔ پارٹیء
 ہرچ لوٹء ضرورت پارٹی باسکء لوٹ بہ بنت، پارٹیء پروگرامانی پیلو کنگء ہاترے
 ہرچونیں جاوڑےء روگء پکار بوت پارٹی باسکء گورء دگہ دورائے مہ بیت، آشوبی
 پارٹی باز سکتیں جاورانی آماج بنت، یک جنگی جاور ہالےء سیاست کنگ لوٹ ایت، اودء ہج
 زانگ نہ بیت کہ پارٹیء باسک کجام وھدےء چونیں جاوڑےء دچار کپ ایت، گرگء
 دزگیر بوت کنت، دژمنء ٹارچر سیلاں ترسناکیں ازیتانی دپجان بوت کنت، روچے ہزار ہر

مرگ ءوتی چمانی دیم ءدیسٹ کنت، مزن مز نہیں پند ءسپر برگ کپ ایت، شپ ءروچ، گرم ءسرد، گزنگی ءبزگی ءتصور آئی ءگور ءنہ بیت، ہزاراں جیڑہانی دیسپانی کنگ کپ ایت، اے سرجمیں جاورہال ءپارٹی باسک ءیک پاد ءپارٹی پیسلہ بنیاد ءاوشنگی انت۔ پارٹی پروگرام ءپیسلہ ءبنیاد ءپارٹی باسک ءرایک رزہے اوں چک ءپد بوگی نہ انت۔ چوشیں جاوراں بگندے پارٹی باسک ءمیان ءزاتی ہزاراں واہشت دیم ءبیانت، بلئے آشوبی بوگ ءآئی ءمستریں چکاس ہمیش انت کہ آگوں وت ءجنگ بہ کنت، وتی زاتی کلیں واہشتاں گوں مکابلہ کت بہ کنت۔ اے کسانیں کارے نہ انت، ہمیشہ نزوریں مردمانی وس ءواک ءنہ انت کہ آشوبی پارٹینی باسک جوڑ بیت کت بہ کنت۔ آشوبی زہنی ءجانی ہر دو بستار ءباز شیو ءچالاکیں مردم بنت، ہمیشہ ہر کسے کہ آشوبی پارٹی ءباسک جوڑ بیت گڑ آئی ءچہ وت ءسرگوزگ ءہائیک بہ بیت، ءسرجماپارٹی ءپابند بہ بیت۔

✚ اقلیت اکثریت ءپابند بوگ:

جمہوری عمل ءبنیاد ءاقلیت ءرا اکثریت ءپابند بوگی انت۔ پارٹی ءتہ ءکجام اوں ادارہ (بخاہ، ہتکین، بنزہ) یے ءمیان ءپیسلہ سازی ءایدگہ چست ءایرانی ہاتر ء اکثریتی لیکہ ءپیسلہ گیش دلجمین بیت ءپہ پارٹی ءگیش پائیدگ مند بیت۔ جی ءکہ آشوبی پارٹی ءمیان ءاکثریتی باسک تہنا حساب (تعداد) ءبنیاد ءچارگ نہ بنت بگندے ہمک

باسک سیاسی بستارے یک سنجے سمایے واھند بیت، آئیء گپء ترانءھیالء لیکھانی تء دلیلء منانک گون بیت۔ پمیشکھ ادء اکثریت گیش ترجیح دیگ بیت۔ چپاء کہ ہرچ ہسابء اکثریتی رائے پھ پارٹیء گیش ارزشت دار بیت۔

پہ درور (مئے یا کہ گیشتر) آشوبی پارٹینی میانء بچاہی لس مجلس (مرکزی کونسل سیشن) گلء مسترء واکد ارتریں ادارہ زانگ بیت، بچاہی لس مجلسء کجام اول پیسلہ اگاں ہما دیوانء اکثریتء من ات گڑا سرجمیں پارٹیء باسک پابند انت کہ ہما پیسلہء پاسداریء بہ کن انت۔ ہمے پیم بچاہی کمیٹیء دیوان بہ بنت یا کہ ہسکینی لس مجلسء بنزہی دیوان پارٹیء ہرچ ادارہء دیوانےء اکثریتی باسکانی پیسلہ پارٹیء متعلقہ ادارہء گڈی پیسلہ زانگ بیت۔ چوش ہم نہ انت کہ اقلیتی پیسلہ گوشدارگ نہ بیت یا کہ آئیء ہج پیمیں ارزشتے نہ بیت، اقلیت اگاں پے پیمیں پیسلہء کارےء میانء دجم نہ بیت تا آئیء جتائیں وھداں جتائیں سنگتء دیوانانی دیمء وتی لیکہ گوں دلجمیء ایرکنگ لوٹ انت، دانکہ یا کہ آوت بہ گیش اتء اکثریتی زرنگیں پیسلہء گوما تپاک بہ دارایتء یا کہ گوں منانکاں وتی گیاں بہ منارین ایت۔ یلئے تاں وھدء کہ اکثریتی باسک آئیء تراناں گوں تپاک نہ دار انتء دیوان پیسلہ نہ زور ایت اقلیتء سرجمء اکثریتء پابند بوگ لوٹ ایت۔

ذیلی ادارہء برزی ادارہء پابند بوگ:

چوشکہ جتائیں پارٹیانی پروگرامانی اسٹرکچر جتائیں شکلاں گیشینگ بوتگ انت۔
 پلئے ہرج پارٹیء میانء ہرج ذیلی ادارہء سرء المی انت کہ برزی ادارہء پابند بہ بیت۔
 چوشکہ پارٹیء بنجاہ، ھنکینء بنزہ پارٹیانی ھاسیں ادارہ زانگ بنت (یا کہ جتائیں مذاحتی
 پارٹیانی تہء دگہ جتائیں بنی ادارہ ھست آنت)۔ ادء ہرج ذیلی ادارہء ۛوتی برزی ادارہء
 پابند بوگ لوٹ ایت۔ چوشکہ بنزہء چیر دستیء ہرچی کہ سیل بنت آھاں بنزہی کابینہء پابند
 بوگ لوٹ ایت، ھمے پیم یک ھنکینءء جہلء ہرچی کہ بنزہ ھست انت آھاں سرجم
 ھنکینء پابند بوگ لوٹ ایت ۛ ھمے ڈولء بنجاہء چیر دستیء ہرچی کہ ھنکین ھست انت
 آھاں سرجم بنجاہء پابند بوگ لوٹ ایت۔ ذیلی ھچ پیمیں ادارہء ۛ ھچ پیم ۛ اے جازت
 نیست انت کہ وتی برزی ادارہء پیسلہء پروگرامانی ھلاپء بہ روت انت یا وتی برزی
 ادارہانی پیسلہاں مہ من ایت۔ اگاں اے رنگیں جاوڑے جوڑ بوت کہ جہلی ادارہ برزی
 ادارہء پیسلہانی منگ ۛ تیار نہ انت گڑا ھما باسک، بنزہ یا ھنکین ۛ نیمگ ۛ چہ پارٹیء توک ۛ
 بغاوت منگ بیت ۛ پارٹیء بنجاہ پابند بیت کہ آھاں سزابہ دنت۔

ۛ ھمے رویہ (ذیلی ادارہء بالائی ادارہء پابند بوگ) ۛ پیدا ک کنگ ۛ مہکم دارگ ۛ ھاترء
 مسترین زمہ داری بالائی ادارہانی سرء کئیت انت۔ پارٹیء لیڈر شپ ۛ لوٹ ایت کہ آ
 دلجی ۛ ذیلی ادارہانی راھشونی ۛ بہ کن انت، ذیلی ادارہانی میان ۛ چونیں اول جیرہء ۛ
 جنجالے پیدا ک بوت گڑا آئی ۛ توجیل سازیء ھاترء ھما وھدء دلجیں گالنج بہ زور انت

تاکہ زیلی ادارہ وٹ ر ایڈر شپ ۽ یا بجاہ ۽ پیسلہ سازی ۽ پابند بہ بنت۔ بالائی ادارہاں لوٹ ایت کہ آزیلی ادارہانی جاوہال ۽ آہانی چاگردی جاوہانی سیاسی تک ۽ پھناتاں دلجمی ۽ آژنا بہ بنت، تاکہ تحکیس راہشونی ۽ مازمان بہ بنت۔ پیسلہ سازی ۽ ہاتر ۽ پارٹی ۽ ہمک بالائی ادارہ ۽ چہ اشاپ کاری ۽ لا پرواہی ۽ باز پھریز لوٹ ایت، گوں بردباری ۽ یکبرے کہ پیسلہ یے زورگ بوت گڑا زیلی ادارہانی میان ۽ آئی ۽ بر جاہ داشت بہ کنت۔ پیسلہ سازی ۽ میان ۽ بجاہ ۽ ایش ہیال اوں گور بہ بیت کہ ہمک کسانیں مدتے ۽ نوکیں پیسلہ سازی ادارہی لیڈر شپ ۽ بودناکی ۽ سرء سوالے بیت، ہمیشکہ لائیکس پارٹی لیڈر شپ ۽ پیسلہ سازی دور سیں ۽ ہمکس لیکہ ۽ ہیالانی برورد بنت، اگاں پارٹی ۽ بجاہ ۽ پیسلہ سازی ۽ ادارہ ہمک ۽ توانانہ بوت، زیلی ادارہان ۽ بجاہی ادارہ ۽ پابند کنت نہ کت گڑا پارٹی لیڈر شپ ۽ نوکی آرگ ہروری بیت، دانکہ پارٹی ۽ بجاہ پارٹی ہر ارکی ۽ ڈسپلن ۽ داشت کت بہ کنت ۽ دژمن ۽ گہتر مقابلہ کت بہ کنت۔ چوشکہ سینٹرل ڈیموکریسی ۽ تہ ۽ تاکتور تریں پورس پارٹی ۽ بجاہ انت، قبضہ گیر ۽ آئی ۽ غیر انقلابی تاکتانی دیماوشنوکیں ۽ توان دار تریں تاکت پارٹی ۽ بجاہ زانگ بیت ہمیشکہ اد ۽ پارٹی ۽ بجاہ اہلیت ۽ سرء سوالے گنجائش ہم مہ بیت۔ پارٹی ۽ میان ۽ ہمکس بالائی ادارہ اے ہر ارکی ۽ سرجم ۽ ہمک داشت کن انت۔ ۽ ایشاں ہوار پارٹی ۽ کلیں زیلی ادارہاں لوٹ ایت کہ بالائی ادارہانی پیسلہ یا کہ ہدایت نامہ آئی چند ۽ گوں دلجمی ۽ بہ وان انت ۽ آہاں شر سر پد بہ بنت ۽ آہانی سرء کار کنگ ۽ ترز کار ۽

گیشینگ ء واستہ وتی میان ء گپ ء تران بہ کن انت۔ تاکہ چرے کلیں چیزاں پارٹی یک ہمکلیں شکلے ء گامے دیم ء شت بہ کنت۔

برزء درشان ء کل ہما پہلو انت کہ چرایانی سوب ء سینٹرل ڈیموکریسی ء وسیلہ ء پارٹی ء ہر ارکی یک منظمیں شکلے ء دیم ء کیت کہ چرائی ء پارٹی یک ہمکلیں جنزے اڈات کنت۔ بلئے ایش ہر ارکی یک راہ ء راہبندانی دیم ء آرگ ء باسکان ء آہانی پابند کنگ ء مستریں وسیلہ وانگ ء زانگ ء چاگردانت، پارٹی ء لیڈرشپ ء لوٹ ایت کہ باسکان ء ہمے سرمالانی بنیاد ء وھد پھ وھد لٹریچر بہ دنت تاکہ باسکانی تہ ء لیکھی بنیاد ء زانت ء سرپدی بنیت، آوت پارٹی، پارٹی ڈسپلن ء راہ ء راہبندانی ارزشت ء سرپد بہ بنت، وھدے کہ باسکانی میان ء اے درگت ء باسائی ء سنج پیدا ک بوت گڑ اپارٹی وت پہ وت ہمکم بوان ء دیمروئی ء نیمگ ء گام جنان کنت۔

پارٹی ء باسکانی جمہوری ہک:

جمہوری بنیاد ء پارٹی ء میان ء ہمک باسکے ء اے ہک است انت کہ وتی گپ ء گال ء ہیال ء لیکھاں دیم ء بیار ایت، ہمک باسک ترند ء چہ ترند ترین تنقید ایر بہ کنت، ہمک باسک وتی ایدگہ چست ء ایرانی تہ ء ابیدے دگہ ترس ء لرزے ء کار بہ کنت۔ چیا کہ جمہوری بنیاد ء اے کلیں باسکانی بنیادی ہک زانگ بنت۔ بلئے ادء جمہوریت پابند انت

ادارہی اسٹرکچرل جوڑشتے، بزانکہ جمہوری بنیادء بنجاہء وتی اسٹرکچر (آئینی دائرہ کار) چون گیشینتنگ، پارٹیء باسک ہما بنیادء وتی عملاں دیمء برت کن انت، پے درور: پارٹیء باسکے وتی ہیالء لیکہانی درشان کنگء ایدگہ چستء ایرانی ہاترء سرجم آزادانت، بلے آپابند انت کہ آئیء ہرچ عمل پارٹیء گیشینتنگیں آئینی دائرہ کارء چہ ڈن مہ بیت۔ پے درور اگاں پارٹیء کجام ادارہ (بنجاہ، ہنکین، بنزہ)ء باسکےء پارٹیء کجام اول ادارہی جیرہءء جنجالےء سرء تنقید یا کہ دگہ ہما ادارہء متعلقہ گپء گال بہ بیت گڑا ادء الم انت کہ ہما باسک پارٹیء گیشینتنگیں اسٹرکچر (آئینی دائرہ کار)ء بنیادء وتی ہبرء ہما متعلقہ جاہء ایر بہ کنت، بزانکہ اگاں بنجاہی باسکے گڑا بنجاہء دیمء وتی ہبرء ایر بہ کنت، ہمے پیم اگاں ہنکینء بنزہء باسکے گڑا وتی گپء ہما متعلقہ دیوانء سر بہ کنت۔ بلے ہجج باسکء رالے ہکءء اجازت نیست انت کہ آپارٹیء میانء وتی متعلقہ ادارہء چہ ڈن پارٹیء راہء راہبندانی پامالیء بہ کنت، چیا کہ جہد آزادیء بندوکیں ادارہ وتی دژمنء چہ ہک وھدء نزورتر بنت، آہانی گورء آہانی مستریں تاکت آہانی ڈسپلن / ادارہی ہر ارکی انت کہ پے باسکء المی انت کہ آئیء پابند بہ بیت، دانکہ ہمے ڈسپلنء بنیاتء وتی نزوریء شریاں وتی متعلقہ جاہ (کونسل سیشن، بنجاہی مجلس، ہنکینی لس مجلس ء بنزہی دیوان)ء چارگء تپانگء جہد بہ کنتء دیمترء نزوریاں رگگء شور بندی بہ کنت کہ چریشاں دژمنء سما اول مہ کپ ایت۔ ء اش کل ہما وھدء ممکن انت سیاسی ء انقلابی ور کریک مہکمیں ہائیر ارکی ء ڈسپلنء تء بہ بیت۔ ء ایشء ہوار باسکء راتوی گپء

ہالء دائرہ کار اوں زانگی انت، آئیء پارٹیء کارانی میانء وئی ہرچ پیہمیں چست ء ایر پارٹیء اسٹرکچرء بنیادء کنگی انت۔ بزائکہ کلیں باسکانء وئی گل ء جٹائیں پروگرامانی دیمء برگ ء کلیں ہک ہست انت، یلئے وئی وئی متعلقہ ادارہ (بجاء، ہٹکین، بنزہ) ء دائرہ کارانی تھا۔

پارٹیء بجاہی مہار:

پارٹیء میانء چہ درستائ مستریں زمرہ واری پارٹیء چہ درستائ مستریں ادارہ بجاہء سرء کیت انت، چیاکہ بجاہ چہ درستائ مسترء واکد ارتیں ادارہ انت۔ پمیشکہ بجاہء را پارٹیء راہ ء راہبند ء ڈسپلن ء سرجم پابند بوگی انت۔ ہرچو نمیں نکلیگیں جاوراں گوں ترمدی ء اوشنگی انت ء آہانی مکابلہ کنگی انت۔ یہ پارٹی مکسدء ہاترء وئی زندگی ء چند کربان کنگی انت۔ اگاں کجام اوں پارٹیء میانء آئیء بجاہ نزور بوت، پارٹیء میانء ڈسپلن ء مہار بے مہار بوت۔ پارٹیء بجاہء جاورانی مکابلہ کنگ ء سکت مان نہ بوت گڑا آپارٹیء راہچ پیہمیں گدء باندات نہ بیت۔ پارٹیء باسک شنگ ء شانگ ء بہر بانگ ء نیگ ء روانت، کہ چرائیء سوب ء پارٹی چہ وئی بجاہی لیکہ ء پروگرام ء زہر بیت، پمیشکہ ادء چہ درستائ مستریں زمرہ واری پارٹیء بجاہء سرء کیت کہ آپارٹیء راہ ء راہبند بزائکہ ڈسپلن ء مہارء مدام ترند بہ دارایت ء پارٹیء کلیں باسکانی سرء اوں الم بیت کہ آپارٹیء ڈسپلن ء سرجم

پابند بہ بنت۔ اے راستے کہ یک آشوبی پارٹی ء تہ ء مردم رضا کارانہ بنیاد ء ہوار بنت بلئے
 آشوبی پارٹی ء بہر بوگ ء پدھج باسک ء جہد کارے ء اے موکل دیگ نہ بیت کہ آپارٹی ء
 پروگرام، آئی ء ترزکار ء آئین ء راہبندانی پامالی کنگ بہ بیت۔ پارٹی ء ڈسپلن ھیمینکس
 سخت بہ بیت کہ اگاں سینٹرل لیڈر شپ ء تہ ء جاوے اتک کہ کسے چہ ڈسپلن ء چپ شت
 گز اپارٹی آئی ء چہ پارٹی ء چہ کٹگ ء چک ء پد مہ بیت۔ پارٹی ء باسکان ء یک انجیں
 جاوہالے پیدا کنگی انت کہ اود ء مرکزیت ء ھمبرائی ء جمہوریت ھم بہ بیت، ڈسپلن ء
 ھمبرائی ء توواکی اوں بہ بیت، تاکہ باسکانی میان ء سیاسی ء علمی ساچستی عمل اوں اوشت
 آماج مہ بیت۔

پارٹی ء میان ء رد آشوبی سوچ ء پکر:

باز وھداں مارا پارٹی ء باسکانی میان ء جتائیں شکلاں رد آشوبی پگر ء ھیال دیما
 کابنت، کہ چرایانی سوب ء پارٹی ء ساخت اسر مند بیت ء آئی ء تھکیں کٹک ء دیم ء جتائیں
 اڈاند سر چست کن انت۔ چوشیں جاوراں پارٹی ء واستہ الہی بیت کہ ھما وھد ء جند ء چوشیں
 رد آشوبی سوچاں ایر بہ جنت ء آھاں سر جم بہ داریت۔ اگاں نا اے جاوہ دارگ نہ بوت
 گز اھمے رد آشوبی پگر ء ھیال پارٹی ء سر جمیں ادارہانی سر ء وتی ساناں دور دینت کہ چریشی ء
 پارٹی ء اجتماعی لیکہ ء جند اسر مند بیت ء پرشت ء پروشی چاگردے ودیگ بیت۔ اے

جاوڑے پیدا ک بوگ ۽ ڇه درستاں مسترین سبب ایش بیت که پارٹی ۽ لیڈرشپ همے رد آشوبی سوچ ۽ پگرائی دارگ ۽ هاتر ۽ یکمشت نہ بنت، ۽ باسکان ۽ پارٹی ۽ چکیں کشک ۽ بارو ۽ آشوبی وانگ ۽ زانگ ۽ بنیاد ۽ تربیت دات نہ کن انت۔ ہمیشک باسکانی میان ۽ رد آشوبی پگر سرکشان بنت۔ باسک که وهدهے پارٹی ۽ بهر بنت گڑا پارٹی آهان ۽ آهانى راجى جزبه، زمینی مهر، مخلصی ۽ ایمانداری ۽ بنیاد ۽ تهنایا مه دنت، جی ۽ که چو شیں کلیں پہلو باسکانی مستقل مزاجی ۽ هاتر ۽ کارآمد بوت نہ کن انت۔ بگندے خود گرزین رد آشوبی پگرائی آماج بنت، ڇه ادارہانی کسان کسانیں سو بھندیاں دلاں وش کن انت ۽ ایمن بنت، بلئے همے باسکانی میان ۽ ڇه پیمیں اول نگیک ۽ تاوان باریں جاوڑے بنیت گڑا اے وتی دستان چست کن انت ۽ دلپروشی ۽ آماج بنت۔ ہمیشک پارٹی ۽ راتهنایا باسک اے هاتر ۽ دارگی نہ انت که آ ایماندار انت بگندے ترندیں ۽ نگیکیں جاوراں پیسله سازی ۽ نوکیں رنگے ۽ کارانی دیما برگ ۽ اہلیت پیدا ک کنگی انت۔ باسکان ۽ ڇه دژ من ۽ تاکت ۽ پرورش دیگ ۽ هاتر ۽ اجتماعی لیکه ۽ آشوبی زانت ۽ زانگ ۽ بنیاد ۽ انچوش تیار کنگی انت که پارٹی اسٹر کچر ۽ ہرار کی ۽ سرپد به بنت، بجاہی لیکه ۽ پروگراماں به زان انت، جنر ۽ جتاکیں تک ۽ پهنات (Fronts) آں به سمبال انت۔ دژ من ۽ ہارڈ ۽ سوفٹ پالیسیانی کاؤنٹر کنگ ۽ هاتر ۽ تاکت به دار انت، بقول لینن ۽ "به یک وقت تیور ۽ ٹیکل ۽ پکٹیکل به بنت" گڑا چریشی ۽ آشوبی پارٹی ۽ میان ۽ رد آشوبی پگرائی دیم ۽ آگ ۽ گمان وت نزور بیت، جی ۽ مردمانی پوکس ۽ چند دژ من جوڑ بیت ۽ باسک ڇه وت ماں وتی یا که سطحی دنیا ۽ درکایت۔

چے کنگ بہ بیت؟

چوشکھ مئے سیادی گوں آشوبی راجی جنزے ۽ انت، مرچی نیں زمانگ ۽ آشوب آرگ یا کہ دنیا ۽ کبزه گیریں تاکتانی پرورش دیگ چہ اہد ۽ آشوبی جنگانی کساس ۽ باز جتا انت۔ پمیشکھ مارا مرچی ۽ اہد ۽ لوٹانی پداوتی راجی جنز ۽ بلوچ سر زمین ۽ لس مہلوک ۽ نفسیات ۽ زمینی جاورانی حساب ۽ جوڑینگ ۽ پارٹی ۽ تنظیمی پروگرام ٹہینگ لوٹ ایت۔ مہکمیں گل ۽ پارٹی لوٹ ایت، دلجمیں ہمنستی ۽ یکجاہی لوٹ ایت، جتا نیں فیلڈاں باصلا جیتیں مردم لوٹ ایت، منظمیں ڈسپلن ۽ ادارہ جاتی رویہ لوٹ ایت۔ بز انکہ یک جان سلا متیں جنزے ۽ ہاتر ۽ جان سلا متیں آشوبکار لوٹ ایت۔ برز ۽ درشان بوتگیں سر جمیں ڈسکیشن ۽ مول ۽ مراد ایش انت کہ یک جان سلامت ۽ مہکمیں جنزے چے پیم پیداک کنگ بوت کنت؟ سماج گلامی ۽ آس ۽ ستلگ، مہلوک زہنی بستار ۽ جتا نیں نادراہیانی آماج انت۔ کبزه گیر ۽ داشتنگیں رد آشوبی ۽ چاپلوس ڈیھ ۽ مال ۽ مڈیاں چو آپ ۽ نہاد ۽ بہانگ ۽ انت، راجی بقا ۽ وجودیک مزین تر سے ۽ تہ ۽ انت۔ پہ ہشکیں ننگ ۽ سنیل ۽ چارگ ۽ وھد نیست، نوں چے کنگ بہ بیت؟

برز ۽ پارٹی، پارٹی اسٹرکچر، ہائیرارکی، راہبند ۽ ڈسپلن ۽ پچار ۽ پدمئے ایش ڈسکیشن ۽ مسترین بہر "سینٹرل ڈیموکریسی" ۽ تصورات۔ کہ ایش تصور ۽ پابند بوگ ۽ نہ

بوگ ۽ جتانیں رویہ ۽ سوچانی میان ۽ گپ ۽ گال کنگ بوت۔ یک آشوبی جنزے ۽ میان ۽ بہ یک وهد دوشے بازالم انت یکے وتی وانگ ۽ دو می دژ من ۽، یک آشوبی جنزے تاں ہماوهد ۽ سوین بوت نہ کنت تا کہ آوت ۽ دژ من ۽ دلجمی ۽ ونت کت مہ کنت۔ مئے ایش ڈسکیشن ۽ مسترین مکسد وتی وانگ انت، وتی کیلو ۽ کساس کنگ انت، کہ مرچی ما کجا اوشتانگ ایں؟ دژ من ۽ مکابلہ ۽ مئے بستار ۽ ہیسیت چے انت؟ آشوبکاراں چھ وهد کسان ۽ مز نین جنزے پائید گانی بنیاد ۽ آزمان سر ۽ زورگی نہ انت، وتار اتسد دیگ ۽ وش پھی ۽ آماج بوگی نہ انت۔ بگندے ہرج سو بندی ۽ ہمبرائی ۽ آھاں انگت وتار اباور کنا نیگی انت کہ چیزے ناچیزے پشت کپتنگ، یک نایک کمی ۽ نزدی یے الم ہست انت؟ اگاں نا ماوش پھی ۽ آماج بوتیں ۽ اے باور کت کہ اے گنجائش نیست انت کہ مئے میان ۽ کمی ۽ گیشی یے بہ بیت، گڑ ازانکہ ہماروچ مئے تباہی ۽ بربادی ۽ روچ بندات بنت ۽ آشوبی راہ ۽ در بند بنت، چو اوشتوکیں آپ ۽ ماگڑ جوڑ بنیں ۽ بوہ کن ایں۔

راستے کہ مرچی مئے گور ۽ جتانیں شکلاں آشوبی گل ۽ پارٹی جوڑ انت، بلتے اد ۽ جست ایش پاد کنت کہ آیا (ہاسکاراے بیست سالی) دراجیں مدت ۽ پد مئے تہ ۽ ہنکس سکت اتنگ کہ وتار او نت کت بہ کن ایں۔ تنقید ۽ زیہاترین پہلو خود تنقیدی ۽ لنک ۽ وتی سرکل ۽ سینگاں جنگ ۽ جرات دار ایں؟ وتارا کساس کت کن ایں؟ پہ درور یک نودربر آشوبی گلے ۽ بحیثیت ۽ بلوچ نودربر گل اے جاوراں کجا اوشتانگ، بلوچ ورنابانی سر ۽ آئی ۽ دزرس کجام ہد ۽ مہکم انت؟ آور نابانی بنیاد ۽ تربیت ۽ ہاتر ۽ چے کت کنگ ۽ انت؟ چرائی ۽

نیمگ ء بلوچ راجی جنزء پر وڈ کٹ چے رسگ ء انت؟ آیا آئی ء اے کلیں کار استیں راجی جنزء لوٹانی حساب ء آئی ء دلجمیں پائیدگے دات کت کنگ ء انت؟ ہمے سیم راجی پارٹی ء آھانی جہل ء ایدگہ ادارہ کجا اوشتاگ انت، آھانی ء راج ء میان ء نزدیکی ء همگرچی ء میار چے انت؟ آوتی جنذء مہلوک ء چینکس زان انت ء آھانی استیں تب ء نفسیاتاں سرپد انت، مہلوک ء میان ء شعور ء زانت پیدا ک کنگ ء ہاتر ء آھانی گور ء پہ لس مہلوک ء چونیں پروگرام ہست انت؟ ء ایشاں ہوار مستریں جست ایش انت کہ ہمیش کلیں گل ء ادارہاں وتی میان ء سیاسی تب ء ترز کارانی تہ ء چینکس بدلی آڈرنگ؟ پہ جنزء چوشیں کیڈرے جریدگ کنگ بوتگ کہ آراجی جنزء رانوکیں، جتائیں سیاسی تب ء میلے دات بہ کت، آئی ء چارگ ء انداز جتا بہ بیت، یا کہ آھانی گور ء نوکیں ترز کار ء مذاحتی ٹیکٹس بہ بنت۔ آیا ہما سنگت ء راھشون کہ ہمے جنزء میان ء جتائیں مہازاں پہ زمین ء ڈیھ ء مہلوک ء ہاتر ء ندر بوتگ انت، کید ء زنداناں بندیک انت، ہمے ہور کیں جاھانی گرگ ء ہاتر ء دگہ چینکس کیڈر پیدا ک کنگ بوتگ؟ اے کل لہتیں انچیں جست انت کہ ماراوتی وانگ ء وھدال دیم ء کاینت۔

مئے گور ء وتی وانگ ء دومی ہاسیں جست مئے کتابک ء سرہال "سینٹرل ڈیمو کریسی" ء بنیاد ء انت۔ سینٹرل ڈیمو کریسی ء ہاسیں پہلو آئی زانگ ء پدمار ایش چارگی انت کہ آیا مئے گل ء پارٹیانی میان ء اے تصور چینکس مہکم انت؟ آیا پارٹیانی میان ء باسک سرجماسر جم پارٹی ء پابند انت، زلی کلیں ادارہ پارٹی ء ہرارکی ء سرپد انت ء آئی ء

پالوکنگ ۽ انت؟ پارٹی ۽ ادارہانی میان ۽ فرد سوچ ۽ بالائی، میر ۽ متبری، ٹولی ۽ گروپ بازی ۽ تصور نیست انت؟ بالائی ادارہاں بگر تاکہ زلی ادارہاں کل پارٹی ۽ ہر ارکی ۽ سرجم پابند انت؟ ۽ چرے درستاں گیش ایش کہ گل ۽ پارٹی لیڈر شپ ۽ گور ۽ ہمیش ہر ارکی ۽ ڈسپلن ۽ مہار چینکس ترند انت؟ چہ لیڈر شپ ۽ نیمگ ۽ باسک ۽ زلی ادارہانی اینکس تربیت بوتگ کہ آدارہ ۽ ہر ارکی ۽ بہ زانت ۽ چہ زانت آئی ۽ پابند بہ بنت؟ چہ اے کلیں تک ۽ پہناتانی چارگ ۽ گیشینگ ہاتر ۽ چہ کلیں ہاتر داریاں بالا ادارہی باسک ۽ ہاسکار گل ۽ پارٹیانی قیادت ۽ یک مزنیں کر دے پیلوکنگ لوٹ ایت۔ پارٹی ارزشت ۽ آئی ۽ میان ۽ سینئرل ڈیمو کریسی ۽ تصور ارزشت ۽ اہمیت دیم ۽ آرگ ۽ آہانی بارو ۽ وانگی مواد بہر ۽ بانگ لوٹ ایت، وتی سرکل ۽ دیوانانی میان ۽ ہمے بنگپ ۽ سر ۽ (۽ وتی وانگ ۽) واستہ ڈبیٹ ۽ ڈسکیشن چاگرد دیم آرگ لوٹ ایت، تاکہ لس باسک بندت ۽ ہمے تصور ۽ جند ۽ وت سر پد بہ بنت، پداگڑاپہ پارٹی ۽ ایشی ۽ دارگ اینکس گران نہ بیت۔ جی ۽ کہ ماہیسر ۽ درشان کنگ ات کہ آشوبی گل ۽ پارٹیانی جوڑکنگ ۽ پد مستریں کار آہانی مہکم ۽ بر جاہ دارگ انت، آہانی وتی جند ۽ میان ۽ مہکم ۽ منظم بوگ انت۔ جی ۽ کہ راجی آجوتی جنز ۽ سر جمیں دار ۽ مدارگوں ہمے گل ۽ پارٹیاں ہمگر نچ انت، پمیشکہ استیں وھد ۽ لوٹ ۽ گزر ہمیش انت کہ آشوبی گل ۽ پارٹی وتی وتی ادارہانی ہر ارکی ۽ سرجم مہکم بہ دار انت تاکہ یک سلا متیں راجی جنز ۽ دیم ۽ آرگ ۽ سوپین بہ بنت۔

بلوچ راجی جنزء میان ء سینئرل ڈیموکریسی ء سیاست:

سیاست ء میان ء یہ سیاسی چست ء ایر ء جنزانی ماناء ہاتر ء ہچ پیمیں تچکیں
 لکیرے بوت نہ کنت، بگندے ہرچ ڈیھ ء زمینے ء جتائیں جاورانی ہساب ء جتائیں شکلاں
 جنز دیم ء کاینٹ۔ دنیا ء آشوبی جنزانی گوستانک ء مارا جتائیں آشوبی جنز جتائیں شکلاں دیم
 کاینٹ۔ بلئے یہ مز نیں آشوبی جنزانی ہاتر ء آشوبی گل ء پارٹی ء درکار بیت۔ یہ یک
 جنزے ء ہاتر ء اے المی نہ انت کہ یک گل ء یک پارٹی یے بہ بیت، بگندے المی ایش
 انت کہ کیس نظر یہ ء مگسد ء جنزء میان ء گل ء پارٹیانی میان ء پہ راجی جنزء یک ہم آہنگی ء
 تحریکی پیسلہ سازی ء ہاتر ء انچیں سپریم ادارہ یے بہ بیت کہ اود ء تحریک ء ہاتر ء گپ ء
 گال بہ بیت، تحریکی لیول ء پیسلہ زورگ بہ بیت۔ سر جمیں تحریک یک سر جمیں ہرار کی ء
 پابند بہ بیت۔

چوشک بلوچ جنزء میان ء جتائیں گل ء پارٹی کارکنگ ء انت ء ہرچ جنزء
 پارٹی ء وتی جتائیں اسٹرکچر ء ترزکار انت۔ بلئے کل آجوتی ء تحریک ء بہر انت، اجتماعی
 بستار ء یک لیکہ ء یک مگسدے گرگ ء ہاتر ء جہد ء انت۔ نوں اد ء تحریک ء لوٹ ء
 ضرورت ایش بنت کہ ہے گل ء پارٹیانی یک انچیں ہمنستی ء پترے بہ بیت کہ اود ء
 تحریک ء جند ڈسکس بہ بیت، تحریک ء حساس ء چہ حساس ترین جیرہ دیم ء آرگ بہ بنت۔
 پہ تحریک ء پیسلہ زورگ بہ بیت، چہ ء کہ کلیں ادارہانی پروگرام جتا انت بلئے مگسد یک
 انت، چہ تحریک ء سو بوندی بز انکہ آزادی ء گرگ ء پد ہے جتائیں ادارہانی مہلوک ء یکباہ

یک اسٹیٹ یے اڈ دیگ لوٹ ایت، یکجاہ آدمی برگ لوٹ ایت، آشوب ۽ دومی مستریں بہر ۽ سر ۽ دو بر یکجاہی ۽ کارکنگ لوٹ ایت۔ البت اد ۽ یک گپے زہن ۽ بہ بیت کہ آشوبی جنزانی بندت ۽ یا کہ میان ۽ بازیں ٹولی ۽ مہلوک دیم ۽ کابینت ۽ آشوبی گل ۽ پارٹی ۽ نام ۽ اسٹر کچر اڈ دینت، پہ وتی زاتی واہشت ۽ پائید گانی ہاتر ۽ راج ۽ نام ۽ سیاست کن انت، بلئے آشوبی جنزہ ۽ واکد ار ہما مہلوک بیت کت کت، ہما گل ۽ پارٹی آشوبی کنگ بیت کت کت کہ آئی ۽ تہ ۽ آشوبی جانے بہ بیت، آئی ۽ میان ۽ آشوبی کیڑر ۽ مہکمیں تاکتے بہ بیت، آ تاکت سیاسی آئیڈیائی بہ بیت، مہلوکی بہ بیت، پارٹی پروگرام ۽ ترز کارانی بہ بیت ۽ چہ درستائ گیش لیکھی بستار ۽ سرجم واضح بہ بیت۔ ایشی ۽ ابید اے ہسنتی ۽ پتر ۽ ہر چونیں یا کہ گیر واضحیں گل ۽ پارٹیانی درکار نیست انت۔

پارٹی ۽ جوڑشت ۽ سینٹرل ڈیموکریسی ۽ سر ۽ باوست:

چوشک دنیا ۽ سیاسی چست ۽ ایرانی میان ۽ ہرچ سیاسی تھیوری یا کہ آئیڈیا ہما وهد ۽ منگ بوتگ انت یا کہ سو بندی ۽ نیجگ ۽ شنگ انت کہ عملی بستار ۽ آھاں وتارا منارینت کنگ، ہما آئیڈیائی تہ ۽ ہمکینس جان ۽ سکت بوتگ کہ پہ مہلوکی سیاست ۽ کاراند بوتگ انت۔ ۽ اے ہم راستی یے کہ ہرچ سیاسی تھیوری ۽ آئیڈیائے کہ دیم ۽ کنیت تا آئی ۽ سر ۽ جتاکیں وجوہاتانی بنیاد ۽ گپ ۽ تران ۽ نگد کاری ہم کنگ بیت، یا کہ آشوبی جہدانی

میان ۽ رد آشوبی ٹولی اوں دیما کابینت ۽ آشوبی جہد کارانی دیما اڑاند جوڑ بوگ ۽ جہد کن انت۔ چوشکہ مئے میان ۽ ہم کم و باز چوشین رد آشوبی سوچ ۽ پکر باز وهداں دیما کابینت کہ وتی بے عملی ۽ بے کاری ۽ را مہکمیں جوازے دیگ ۽ ہاتر ۽ بے توار ۽ ہاموش بوگ ۽ بدل ۽ گپ ۽ باوست بندات کن انت، ۽ وتی گپ ۽ باوستاں اوں انجیں مردم ۽ ٹولیانی میان ۽ ایر کن انت کہ آسیاسی، علمی ۽ تجربتی بنیاد ۽ ناہتہ انت یا کہ مہج سہی ۽ سر پد نہ انت۔ یہ درور ایشانی گپ ۽ گال چو اے پیم ۽ انت کہ بلوچ جہد ۽ گل ۽ ضرورت نیست انت، گل ۽ میان ۽ جوڑ بو تگیں اسٹر کچرانی پائیدگ نیست انت یا کہ سینٹرل ڈیموکریسی ۽ تصور ۽ جندر دانت۔ یا کہ ہادراہیں ترز کاراں رد کن انت کہ چرایاں گل ۽ لس مہلوک ۽ میان ۽ مہمگر نچی ۽ چاگردے جوڑ انت (بزاتکہ چاگردے میان ۽ مہلوکی ۽ سیاسی چست ۽ ایر، گلامی ۽ بکشا تگیں مہلوکی کسان مزنین جیڑہاں سیاسی جیڑہ بنیاد ۽ دیم ۽ آرگ ۽ آھاں راجی جیڑہ ۽ بہر کنگ ۽ پروگرام، مہلوک ۽ سیاسی بنیاد ۽ آگہی دیگ ۽ مراکش یا کہ دگہ چوشین ہر چو نہیں مراکش ہست انت اے رد آشوبی ٹولی ایشاں سرجم ایر جن انت) کہ ایشاں ۽ مہج پیہیں کسدے نیست انت۔ یلئے وهدے کہ آھانی دیم ۽ جست ایر کنگ بیت کہ ایشانی نعم البدل ۽ شئے گور ۽ چو نہیں پروگرام ہست انت یا کہ سیاسی تھیوری ۽ آئیڈیاز ہست انت کہ آھانی بنیاد ۽ پریکٹیکلی شتا جہد ۽ دیم ۽ برت کن ات؟ چرایاں آشوبکار لس مہلوک ۽ نزدیکی گیشینت کن ات، لس مہلوک ۽ سیاسی بستار ۽ علم ۽ آگہی دات کن ات؟ تاں پسہ ۽ مہج پیہیں سیاسی تھیوری ۽ آئیڈیازے نیست انت کہ پریکٹیکلی آوت آئی ۽ بہر

بہ بنت ۽ چرائی ۽ دلجم ۽ مشبتیں گامے گندگ بہ بیت۔ تہنا لہتے باوست انت کہ دیم ۽ کایت: بزاتکہ آشوبی گل مردمان ۽ وتی پابند کن انت کہ چرائی ۽ فرد وتی انفرادی صلاحیتاں چہ ز بہر بیت، ہمک فرد وتی تہ ۽ آزاد ۽ وتواک بہ بیت، چہ گل ۽ اسٹر کچر ۽ بالا مردمانی آحانی ہک دیگ بہ بنت آوتی بودشتانی بنیاد ۽ وت کار بہ کن انت۔ اے لبرل چاگرد ۽ آزادی لبرل ریاست ۽ توک ۽ ممکن بوت کنت کہ تو ہمک مردم ۽ راگپ ۽ ہبر کنگ ۽ ہرچ رنگیں کار کنگ ۽ ہاتر ۽ یلا بہ دئے یلئے اے رنگیں ہیال ۽ لیکہ ۽ فردی آزادی ۽ را اہمیت دیگ یک راجی آجوتی جنزے ۽ توک ۽ سک باز ترسناک انت۔ اے رنگ ۽ اگاں ہمک فرد ۽ ہرچ رنگیں گپ ۽ ہبر کنگ ۽ اجازت دیگ بہ بیت گڑا پارٹی کدی ہم دلجمی ۽ گوں یک سوچ ۽ ہیال ۽ بنیاد ۽ کار کنت نہ کن انت ۽ فردی آزادی چپ پارٹی ۽ آزادی ۽ باج بارت ۽ پارٹی چہ وتی اجتماعی کسد ۽ لوٹ ۽ ز بہر بنت ۽ مردمی آزادی ۽ واستہ کار کنگ بندت کن انت۔

یلئے دومی نیمگ ۽ ماجتائیں آشوبی جہداں ہوار بلوچ جہد ۽ وت گندگ ۽ انت کہ اداراتی اسٹر کچراں ہوار سینٹرل ڈیویو کر لسی ۽ ڈولیں تصوراں بلوچ آجوتی جنز چینکس مہکم داشتنگ۔ کہ آئی ۽ بنیاد ۽ ہاس کار چہ گو سنگیں بیست سالانی جتائیں تجربتاں یک مہکس جنزے دیم ۽ اتلگ۔ کہ آئی ۽ مہکمی ۽ دروراں ماچوش زرت کن این: چوشکہ بلوچ چاگرد قبائلی یا کہ نیم قبائلی چاگردے، بلوچ چاگرد ۽ جتائیں زباناں ہبر کنگ بیت، بلوچ جتائیں مذہب یا کہ گیر مذہبی سوچاں چہ سیادی دار ایت، جتائیں رنگ ۽ نسلانی تہ ۽ بہر انت یلئے

چرے دراهیں پرک ۽ درکاں بالا بلوچ گل ۽ ادارہاں گوں ہمے گل ۽ اداراتی سوچ ۽ پکر ۽ سیاسی تھیوری ۽ آئیڈیازاں پر یکٹیکلی یک انجین چاگردے ٹہیننگ کہ اود ۽ ہمے کلیں تضاداں و تاگیشیننگ ۽ یک جنرے ۽ ساہگ ۽ یکجاہ بوتگ انت۔ مرچی یکیں سیاسی ۽ مذاحتی سنگر ۽ جنائیں زبان، جنائیں ہند ۽ دگ، جنائیں ٹک ۽ کٹماں چہ سیادی داروکیں مہلوک یک سوچے ۽ بنیاد ۽ یکجاہ انت، آہانی میان ۽ سیاہ ۽ اسپیت ۽ ہچ پیہمیں پرک ۽ درکے نیست انت۔ اے دراہیں چاگردی اژاندانی ہلاں کنگ ۽ یک منظمیں جنرے ۽ دیم ۽ آرگ ۽ مستریں سوہ ہمے گل ۽ آہانی اسٹرکچر ۽ سیاسی ترزکار انت۔

🇵🇰 سینئرل ڈیموکریسی ۽ سرء بنیادی تقید:

1901 تا کہ 1903 ۽ زمانگ ۽ لینن وھدے کہ دوہرتی پارٹی کانگریس ۽ لوٹائینگ ۽ باقائیدہ پارٹی ۽ ایک مہکمیں شکلے ۽ دیم ۽ آرگ ۽ گوں وتی ایدگہ سنگتتاں جہد ۽ بیت گڑوتی ایدگہ چست ۽ ایرانی میان ۽ لینن ۽ یک مزنیں کارے نبشتہ کنگ بیت، وتی آئیڈیازاں ۽ ایدگہ سیاسی چست ۽ ایر ۽ وت ماں وتی جیڑہ ۽ جنجالانی سرء نبشتہ کنگ ۽ بیت۔ چوشکہ ماہندات ۽ لینن ۽ کتاب "what is to be done?" ۽ پچارے دیم ۽ آؤرتنگ ات، کہ اے کتاب ۽ لینن سینئرل ڈیموکریسی ۽ بنیادی پکر ۽ گیشین ایت ۽ دیم ۽ کار ایت، یلئے وھدے کہ آئی ۽ جنء سرکل ۽ مردم آئی ۽ ہلاپ ۽ پادکانت گڑا اے درگت ۽

لینن ءیک دگہ کتابے کہ 1904 ءنبشته کنگ بیت دیم ءکنیت کہ آئی ءنام "one step forward, two steps back" بیت، چاپ ءشگ بیت۔

چوشکہ جولائی / اگست 1903 ءپارٹی دومی کانگریس ءجتائیں وت ماں وتی اڑاندانی سوب ءپارٹی پرشت ءپروش ءنیمگ ءروت انت، جتا بوو کیں ٹولی ءنام ماشویک (اقلیت) زانگ بیت ءایدگہ ٹولی باشویک (اکثریت) نام ءبچارگ بیت۔ گڑا لینن "One step forward, two steps back" ءتہ وتی آئیڈیاء گیش کیشنگ ءجہد ءدومی ٹولی ءتفقیداں دیم ءکاریت ءنبشته کنت۔ اود ءپادا تلگگیں سیاسی، لہکی ءوت ماں وتی کلیں تراناں دلجمی ءنبشته کنت۔ (پہیشکہ سینٹرل ڈیموکریسی ءسر ءبو تگیں نگدانکائی بنگی نگدانائی زانگ ءہاتر ءماراھے زمانگ کے چارگ لوٹ ایت)، چوشکہ لینن ءابش آئیڈیاء ہلاپ ءمارٹوف، ٹراسکی، روزالگر مبرگ، کارل کاؤٹسکی ءدگہ بازیں آئی ءپیسری بازیں شہزانتیں سنگلتاں جتاہیں ایراداں گوں ارش کت۔ گیشتر نگد کارانی نگدانکائی بنیادی ہیال چوائے پیم ءات انت: "1۔ جمہوری مرکزیت یک، نجاہی تیکے ءواکداری ءنام انت کہ اود ءجمہوریت ءجمہوری چست ءایراں ہج پیمیں ارزشتے نہ بیت۔ ہر چیز برزی ادارہ ءگشگ ءپد ءبیت کہ چرائی ءبنی ادارہائی ارزشت ہلاس بیت ءآہانی بودشت مرانت۔ ءاھتلاپ رائے ءتفقید ءگوشدارگ ءہج پیمیں گنجائش نہ بیت۔ 2۔ سینٹرل ڈیموکریسی ءرامارکسسٹ تھیوری ءساجشتی دیرونی ءنیمگ ءروگ ءچہ دارگ ءٹولے اول گشگ بیت۔ 3۔ ءجمہوری مرکزیت یک انجیں اوزارے کہ اود ءنظریہ چہ برزی

ادارہاں دیگ بنت، ء اسٹر کچر ء چہ ڈن ء ہج پیہمیں احوال گوشدارگ نہ بنت کہ چر لیتی ء مردم باؤنڈ بنت ء ہج پیہار دوم نہ کن انت۔

کاؤٹسکی ء رد ء گل پہ آشوبی رد عمل ء ہاتر ء چہ پیسیر ء جاڑیگ بہ بیت۔ روزا لکسمبرگ گنیت کہ گل ء آشوبی مہلوکی جنزوت پیدا کنت۔ ملنے لینن ء گور ء پہ یک پارٹی ء اے ہر دو میں لوٹ ہست انت۔ چوشکہ لوکاس ء گوں دلجمیں ترزکارے ء لینن ء آئیڈیا درشان کنگ انت، پارٹی چہ آشوبی جنز ء دیم ء آہگ ء آشوبی جنز ء راہشونی کنوک ہر دو انت۔ "ٹراٹسکی ء نبشتہ کنت کہ "اگاں لینن کجام اوں وھدے ء (گوں اے آئیڈیا ء) وا کداری ء کرسی ء نشت گرا پرولتاری ء سرجمیں میاں استمانی جنز ء سنجیدگی ء یک آشوبی عدالتے ء نیمگ ء بھتام جنگ بیت ء مارکس ء سر بلندیں ستر گلوٹین ء جہل ء (چہ جان ء جتا کپینگیس) اولی سر بیت۔ "آایش ہم گش ایت کہ "لینن پرولتاریہ ء سر ء ڈکٹیٹر شپ کنگ لوٹ ایت۔ "مانشویک ال اے ہم گشت کہ "لینن بیورو کریٹک سینٹر لائزیشن آرگ لوٹ ایت، چہ ء کہ لینن یک فارملسٹ، تنگ نزر، ء زدی میں مردے۔"

روزا لکسمبرگ ء ایراد گپت ء گشت کہ لینن "الٹرا سینٹرل ازم ء اوور سینٹری تب ء منوگر یے، آئی ء اے راہبند جنز ء رادمیروئی دیگ ء بدل ء گیش اوشٹ آماج کنت، آئی ء دلگوش چہ پارٹی ء چست ء ایراں برورد کنگ ء بدل ء پارٹی ء سر ء وتی کنٹرول ء مہکم دارگ انت۔"

بلئے چرے در اھیں بنگی گپ ء نگد انکاں ابید ماگند ایس کہ روس ء لینن ء سروکی ء سئے
مز نیس آشوب آرگ بیت کہ آھانی آھگ ء چہ درستاں مستریں سو بے مھکیں پارٹی ء
پارٹی ء میان ء سینٹرل ڈیموکریسی ء تصور بیت۔ روس ء آشوباں ھوار اولی ء دومی جہانی
جنگانی میان ء بے کساس آشوبی گل ء ادارہ چہ ھے لیکہ ء بنیاد ء دیم ء کابینت ء آشوب گر
انت۔ یا کہ چرے درستاں گیش بلوچ ء آشوبی گل ء ادارہ وت مئے دیم ء مز نیس درور انت
کہ برز ء (پارٹی ء جوڑشت ء سینٹرل ڈیموکریسی ء سر ء باوست ء سرہال ء) یک تھکیں
درورے دیگ بوتگ۔ ہمیشہ چرے در اھیں نگد ء باوستاں پد مارا ھے آئیڈیا وتی گلانی
میان ء مھکم کنگ لوٹ ایت، چوش ھم نہ انت کہ ایدگہ سیاسی زانکار ء ساجھنکارانی تران ء
لیکہ گوشدارگ مہ بنت بگندے وتی میان ء ایدگہ دنیا ء چست بوتگیں کلیں لیکہ ء ھیال
وانگ ء سرپد بوگ لوٹ انت، وتی ڈبیٹ ء ڈسکیشن آنی بہر کنگ لوٹ انت، بلئے اے
یک راستی یے کہ تاں ھا وھد ء یک سیاسی لیکہ ء تھیوری یے تاکہ تئی زمینی جاورانی
ھساب ء مہ بیت آتر اچھ پیہیں آسرے دات نہ کنت، ہمیشہ مارا مدام ھا تھیوری ء لیکہانی
بنیاد ء جنزگی انت کہ آگوں مئے استیں زمینی راستیں جاوراں ھمدپ بہ بنت۔

➤ آسر:

چوشکھ دنیاء آشوبی گوستانک ء ہر چینکس کہ آشوبی جنز ء زرمبشت گوستگ یا کہ گوزگ ء انت گڑا آھانی گور ء آشوب ء بندات کنگ، آئی ء برجہ دارگ ء آئی ء تاں یک منز لے ء رسگ پد ء منظم دارگ ء واستہ آشوبی گل ء پارٹیانی وسیلہ ء راجی جنز اولی سلاہ زانگ بوتگ انت۔ ابید ء آشوبی گل ء پارٹیاں مز نیں آشوبی جنگ ء پراہ ء شاہگانیں جنز ء زرمبشت یک جلو ناکیں ہیالے بوت کنت بلے ہا سیں مکدے ء بنیاد ء دیم ء شت کت نہ کنت۔ ہمیشکھ بلوچ راجی آجوتی جنز اوں ہمے فلسفہ ء بنیاد ء یک جنزے جتائیں گل آئی بنیاد ء دیم ء برگ ء انت۔ پے کلیں گل ء پارٹیانی جہد کارانی واستہ اے اژدری انت کہ آگل ء پارٹیانی بنیادی اسٹر کچر ء ہر ارکی ء بہ زان انت، سر پد بہ بنت ء سر جم ء آہانی پابند بہ بنت۔ چوشکھ مئے گور ء ہم گل ء پارٹیانی اسٹر کچر ء راہبندی دائرہ کار سینٹرل ڈیمو کریس ء تصور ء بنیاد ء گیشینگ بوتگ انت، گڑا مئے واستہ اوں الہی بیت کہ ماہمے تصور ء جنہ، ء آئی ء چین ء یک یک کنڈگان ء سر جم بہ زان ایں ء عملی بستار ء آھانی پابند بہ ہیں۔ تاکہ وتی گل ء پارٹیانی میان ء یک مہکمیں آشوبی جاگردے پیدا کہ بہ کن ایں، ء آشوبی ڈسپلن ء راہ ء راہبندی سر جم ادر ہانی پابند بہ کن ایں، تاکہ چریشانی آسر ء یک نیمگے پے گل ء جنز ء کیڈر سازی ء گوں دلجمی ء دیم ء بہ روت انت ء دومی نیمگ ء راجی آجوتی جنز یک مہکمیں شکلے مان بہ پوش ایت ء پے ڈنی تاکتانی پرورش دیگ ء دلجمیں کردے پیلو بہ کنت۔ اگاں نا آشوبی کجام اوں ادارے ء میان ء آئی ء گیشینگ میں بنیادی اسٹر کچر ء راہبندی دائرہ

کار ہشکلیں نام ۽ کاگزنی ہدے محدود بوت انت ۽ ادارہ ۽ ورکر ۽ باسکانی آہانی پابند نہ بوت انت گڑا اودے آشوب ۽ آشوبی گانی ارزشت هلاس بیت، آہانی جاگہ ۽ فردے ٹولی دیم ۽ کایت۔ بلے اءچہ کلاں مستریں زمہ داری گل ۽ بجاہی قیادت ۽ بیت کہ آھے تکلیں لائن ۽ چے پیم گیشین ایت ۽ چون ورکر اں آئی ۽ پابند کنت۔

سنٹرل ڈیمو کریسی ۽ بنیادی جتائیں بہر گانی (پہلو آنی) سرے گپ ۽ گال ۽ پد یقینا آئی ۽ بنیادی کنسپٹ ۽ جندے تائیک ہدے ۽ سرپد بوت ایں۔ چوناہا چوشکہ آزات تاک هیلکاری ۽ یک درچے کہ جتائیں وهداں جتائیں آشوبی ۽ سیاسی بنگلپانی سرے نبشتہ کنگ بیت۔ گل ۽ آشوبی باسکانی میان ۽ آشوبی ڈبیٹ ۽ ڈسکلیشن آنی درپراہ ۽ شاہگان بہ بیت، ۽ ہاسکاروتی جندے کار ۽ پروگرامانی سرے آہانی ہاسیلین زانت ۽ زانگے بہ بیت۔ اگاں نا آشوبی جہد کارانی میان ۽ چوشیں ڈبیٹ ۽ ڈسکلیشن ۽ ماہول نزور بہ بیت یا کہ ہچ مہ بیت گڑا بز انکہ آشوبی ادارہ ۽ باسک رد آشوبی سوچ ۽ پکرانی آماج بوان ۽ زوال ۽ نیمگ ۽ روانت۔ چوشکہ پہ اے چارمی تاک ۽ سرہال "سنٹرل ڈیمو کریسی" گچین کنگ بوتگ کہ ایشی ۽ گیش زانگ ۽ سرپد بوگ ۽ ہاترے گل ۽ باسک سرکل ۽ دیوان اڈ بہ دینت ۽ جنزل ڈبیٹ ۽ نیمگ ۽ برو انت، تاکہ ہمے تصور ۽ جندے گوں دلجی ۽ سرپد بہ بنت۔

سگار پبلی کیشنز

”آزات“ کتابک چہ بلوچ اسٹوڈنٹس آرگنائزیشن آزاد ۽ نیمگ ۽ بلوچ نودربرانی آشوبی ہیلکاری ۽ بھرے۔ آزاد جتائیں وهداں جتائیں سرہالانی سرء چاپ ۽ شنگ کنگ بیت۔ اے کتابک ۽ کشتگ ۽ مول ۽ مراد بلوچ نودربرانی میان ۽ سیاسی ۽ آشوبی سرہالانی سرء گپ ۽ تران ۽ مھکمیں ڈسکشن بندات کنگ انت۔

آزات ۽ اے چارمی کتابک ۽ سرہال ”سینٹرل ڈیموکریسی“ انت۔ سینٹرل ڈیموکریسی یک سیاسی پدکردے کہ آشوبی ادارہانی میان ۽ آہانی مہکم ۽ منظم کنگ ۽ کار بندگ بیت۔ دنیا ۽ آشوبی بند پتر ۽ بازیں مزنا میں ۽ سو بھندیں گل ۽ پارٹی گوستگ انت کہ آ ادارہانی سو بھندی ۽ مسترین مان زمان ”سینٹرل ڈیموکریسی“ ۽ ڈولیں لیکہ بوتگ انت۔ چوشکھ ایر دست ۽ گور ۽ پھ دژمن ۽ ہلاپ ۽ مسترین تاکت ادارہ ۽ آئی ۽ ڈسپلن ۽ ادارہی ہرارکی زانگ بنت۔ یک ادارہ ۽ میان ۽ ڈسپلن ۽ ہرارکی ۽ مھکم ۽ برجہ دارگ ۽ ادارہ ۽ منظم ۽ برجہ دارگ انت۔ ۽ ڈسپلن ۽ ہرارکی ۽ برجہ دارگ ۽ مسترین وسیلہ سینٹرل ڈیموکریسی انت۔ پھیشکھ چہ گل ۽ آئی ۽ مکسد ۽ ڈسکیشن ۽ پد اے رنڈیکیں کتابک ۽ سینٹرل ڈیموکریسی ۽ بنگپ ۽ سرء انت دانکہ آشوبی سرکل ۽ دیواناں ۽ ہاسیں سرہال ۽ گپ ۽ تران ۽ درے پچ بہ بیت۔